



## Komunikado di prensa

21 di novèmber 2024

---

### **Cft: "Enfoká riba oumento di ingresonan"**

**Philipsburg – Cft tin bastante tempu ta ekspresá su preokupashonnan tokante di e echo ku e ingresonan di Sint Maarten no ta alkansá e nivel antisipá, loke ta nifiká ku e pais tin rekursionan propio limitá pa gastunan públiko importante. Ku e adopshon di e modifikashon presupuestario 2024 i e konseho positivo korespondiente emití pa Cft, Sint Maarten por kontratá un fiansa pa invershonnan.**

#### **Presupuesto pa 2024 i 2025**

Ku e adopshon di e modifikashon presupuestario 2024 i e konseho positivo emití pa Cft, Sint Maarten awor por kontratá un fiansa pa e konstrukshon di un prizòn nobo, generadornan pa GEBE i un edifisio nobo pa e Mental Health Foundation. Ademas, Sint Maarten ta trahando duro pa kompletá e presupuesto pa 2025. Pa promé biaha for di 2010, ta posibel pa Sint Maarten adoptá e presupuesto promé ku e aña nobo ta kuminsá, loke ta nifiká ku e pais ta dunando pasonan signifkante den e mehorashon di e prosperidat di su siudadanonan i di finansas gubernamental.

#### **Oumento di ingresonan**

E sistema di impuesto di Sint Maarten ta antikuá i e Servisio di Impuesto tin problema di implementashon. Debí na esaki, e ingresonan di impuesto ta ménos kompará ku otro paisnan den Reino. Konsekuentemente, Sint Maarten ta pèrdè ingresonan supstansial i e pais no tin suficiente rekurso propio pa invershonnan importante. P'esei, Cft ta bolbe enfatisá e importansia di modernisá tantu e sistema di impuesto komo e Servisio di Impuesto. Resientemente a inisiá un trayekto di reforma pa Servisio di Impuesto.

E echo ku un instansha so lo kobra impuesto i prima tambe lo kondusí na kobransa mas eficiente i na mas ingreso. Banda di esei, tin mas opshon pa oumentá e ingresonan, manera e introdukshon di un impuesto riba turismo, e reforma di e impuesto riba alohamentu i e introdukshon di un seguro médiko general. Cft ta urgi pa implementá e plannan aki mas pronto posibel pa asina generá mas ingreso i ta mira ku miéntras tantu ta dal e promé pasonan pa logra esaki.

#### **Klima i energia**

Durante su bishita, e delegashon di Cft a bishitá vários entidat ku ta traha riba e area di klima i energia. Proyektonan pa prosesamentu di residuo mas sostenibel i e realisashon di un instalashon pa prosesamentu di awa residual tabata e enfoke sentral. Banda di esei, e delegashon di Cft a bishitá GEBE, kaminda a papia di e situashon finansiero di e empresa, energia renovabel i invershonnan sostenibel. Durante un bishita na Nature Foundation Sint Maarten a papia di e importansia di preservashon di naturalesa i e falta di rekursionan aktualmente disponibel. E motibu prinsipal pa e bishitanan aki tabata pa evaluá e impakto di e inisiativanan aki riba e presupuesto multianual di e pais.

[Fin di komunikado di prensa]



**Potrèt**

Nathan Roosberg

**Deskripsjon di potrèt**

Cft ta bolbe enfatisá e importansia di modernisá tantu e sistema di impuesto komo e Servisio di Impuesto.

**Nota pa e redakshon – no publiká**

Persona di kontakto di Cft:

Sekretariado di Kolegionan di supervishon finansiero  
Telefòn +5999 461-9081 / +5999 461-9082 / +5999 461-9084  
Koreo elektróniko info@cft.cw  
Wèpsait www.cft.cw

**Kontaktonan di prensa:**

Jefka Alberto  
Telefòn +5999 512-6861